

Na osnovu člana 16. stav 2. Zakona o Vladi Zeničko-dobojskog kantona – Prečišćeni tekst („Službene novine Zeničko-dobojskog kantona“, broj 7/10), Vlada Zeničko-dobojskog kantona, na prijedlog Ministarstva za obrazovanje, nauku, kulturu i sport, na 65. sjednici, održanoj 31.05.2012. godine, d o n o s i

ODLUKU
o pokretanju postupka za dodjelu stipendija redovnim studentima prvog i drugog ciklusa
studija sa prebivalištem na području Zeničko-dobojskog kantona
u akademskoj 2011/2012. godini

Član 1.
(Predmet Odluke)

Ovom odlukom pokreće se postupak za dodjelu stipendija redovnim studentima prvog i drugog ciklusa studija sa prebivalištem na području Zeničko-dobojskog kantona u akademskoj 2011/2012. godini i utvrđuju se kriteriji za dodjelu stipendija, korisnici stipendija, visina i način isplate stipendija, te način realizacije isplate sredstava za dodjelu stipendija.

Član 2.
(Sredstva za realizaciju)

(1) Sredstva iz člana 1. ove odluke realizovat će se u skladu sa odobrenim mjesečnim operativnim planovima, a u skladu sa realizacijom ostvarenih javnih prihoda u prethodnom mjesecu.

(2) Vlada Zeničko-dobojskog kantona će nakon okončanja konkursne procedure posebnom odlukom utvrditi visinu sredstava za realizaciju ove odluke.

Član 3.
(Kriteriji i raspisivanje konkursa)

(1) Kriterije utvrđuje Vlada Zeničko-dobojskog kantona na prijedlog Ministarstva za obrazovanje, nauku, kulturu i sport i imaju se smatrati sastavnim dijelom ove odluke.

(2) Konkurs raspisuje Ministarstvo za obrazovanje, nauku, kulturu i sport.

Član 4.
(Korisnici)

Pravo učešća na konkursu imaju redovni studenti prvog i drugog ciklusa studija (redovni koje finansira osnivač visokoškolske ustanove i redovni samofinansirajući).

Član 5.
(Visina stipendije i način isplate)

(1) Visina stipendije po jednom korisniku iznosi 700,00 KM (slovima: sedamstotina konvertibilnih maraka), a isplaćuje se u dva jednaka bespovratna iznosa od po 350,00 KM (slovima: tristotinepedeset konvertibilnih maraka).

Član 6.
(Realizacija odluke)

Za realizaciju ove odluke zadužuju se Ministarstvo za obrazovanje, nauku, kulturu i sport i Ministarstvo finansija, svako u okviru svoje nadležnosti.

Član 7.
(Stupanje na snagu)

Odluka stupa na snagu danom donošenja i objavit će se u „Službenim novinama Zeničko-dobojskog kantona”.

Broj: 02-_____/12.
Datum, 31.05.2012. godine
Zenica

PREMIJER

mr.sci. Fikret Plevljak, dipl.ing.

DOSTAVLJENO:

1x Ministarstvo za obrazovanje, nauku, kulturu i sport,
1x Ministarstvo finansija,
1x „Službene novine Zeničko-dobojskog kantona“,
1x a/a.

Na osnovu člana 3. Odluke o odobravanju sredstava za dodjelu stipendija redovnim studentima prvog i drugog ciklusa studija sa prebivalištem na području Zeničko-dobojskog kantona u akademskoj 2011/2012. godini, broj 02-38-12449/12 od 31.05.2012. godine, Vlada Zeničko-dobojskog kantona, na prijedlog Ministarstva za obrazovanje, nauku, kulturu i sport, u t v r đ u j e

K R I T E R I J E

za dodjelu stipendija redovnim studentima prvog i drugog ciklusa studija sa prebivalištem na području Zeničko-dobojskog kantona u akademskoj 2011/2012. godini

Član 1.

(Korisnici)

U skladu sa Odlukom o odobravanju sredstava za dodjelu stipendija redovnim studentima prvog i drugog ciklusa studija sa prebivalištem na području Zeničko-dobojskog kantona u akademskoj 2011/2012. godini, iz Budžeta Zeničko-dobojskog kantona za 2012. godinu dodijelit će se stipendije redovnim studentima prvog i drugog ciklusa studija sa prebivalištem na području Zeničko-dobojskog kantona, koji ispunjavaju uvjete utvrđene ovim kriterijima i konkursom.

Član 2.

(Pravo učešća na konkursu)

Pravo učešća na konkursu imaju kandidati koji ispunjavanju sljedeće uslove:

- a) da su državljani Bosne i Hercegovine,
- b) da imaju prebivalište na području Zeničko-dobojskog kantona,
- c) da su redovni studenti prvog ili drugog ciklusa studija na visokoškolskim ustanovama u BiH ili izvan BiH, bez obzira na način finansiranja studija (redovni koje finansira osnivač visokoškolske ustanove i redovni samofinansirajući),
- d) da su ovjerali zimski i upisali ljetni semestar akademske 2011/2012. godine.

Pravo učešća na konkursu nemaju:

- a) studenti koji koriste usluge smještaja i ishrane u studentskim domovima,
- b) studenti koji primaju stipendiju po bilo kom drugom osnovu,
- c) studenti koji obnavljaju godinu studija,
- d) studenti u statusu apsoluta,
- e) studenti koji su u akademskoj 2010/2011. godini ostvarili pravo na stipendiju kao studenti prve godine studija, a u akademskoj 2011/2012. godini ponovo upisali prvu godinu studija na nekom drugom fakultetu.

Član 3.

(Lista kandidata)

Lista kandidata za dodjelu stipendija sačinjava se na osnovu ukupno ostvarenog broja bodova koji se dodjeljuju za ostvareni uspjeh, godinu studija, ekonomsko-socijalnu situaciju, invalidnost studenta, kao i studentima bez oba roditelja.

Član 4.

(Kriteriji)

(1) OSTVARENI USPJEH (studenti prve godine prvog ciklusa studija)

a) Ostvareni uspjeh u srednjoj školi:

- 1) za studente koji su u toku srednjoškolskog obrazovanja ostvarili prosječan uspjeh *odličan* bodovanje se vrši tako što se prosječna ocjena uspjeha uveća za 4 i množi koeficijentom 5,
- 2) za studente koji su u toku srednjoškolskog obrazovanja ostvarili prosječan uspjeh *vrlo dobar* bodovanje se vrši tako što se prosječna ocjena uspjeha uveća za 3 i množi koeficijentom 5,

- 3) za studente koji su u toku srednjoškolskog obrazovanja ostvarili prosječan uspjeh *dobar* bodovanje se vrši tako što se prosječna ocjena uspjeha uveća za 2 i množi koeficijentom 5,
- 4) za studente koji su u toku srednjoškolskog obrazovanja ostvarili prosječan uspjeh *dovoljan* bodovanje se vrši tako što se prosječna ocjena uspjeha uveća za 1 i množi koeficijentom 5,
- b) studentima prve godine koji su bili učenici generacije u srednjoj školi dodaje se još 25 bodova;

(2) OSTVARENI USPJEH (studenti druge i viših godina prvog ciklusa studija, kao i studenti prve/druge godine drugog ciklusa studija)

- a) bodovanje se vrši tako što se prosječna ocjena svih položenih ispita u toku studija, uključujući i prvi ciklus, množi koeficijentom 5,
- b) studentima koji su ostvarili najmanje prosječnu ocjenu 9,00 ili ekvivalent, pored množenja koeficijentom 5 dodaje se još 5 bodova.

(3) GODINA STUDIJA

- a) studenti druge godine - 4 boda
- b) studenti treće godine - 6 bodova
- c) studenti četvrte godine - 8 bodova
- d) studenti pete godine - 10 bodova
- e) studenti šeste godine - 12 bodova

NAPOMENA: U skladu s članom 5. stav 1. Okvirnog zakona o visokom obrazovanju, prvi ciklus studija traje najmanje tri i najviše četiri godine. Jedna godina studija vrednuje se sa 60 ECTS bodova (European Credit Transfer System). Iz odredbi člana 5. stav 1. izuzima se studij medicinske grupe nauka, koji se u prvom ciklusu studija vrednuje do 360 ECTS bodova, odnosno, koji može trajati do 6 godina.

Drugi ciklus studija traje jednu ili dvije godine (zavisno od trajanja prvog ciklusa studija) i vrednuje se tako da u zbiru s prvim ciklusom studija nosi 300 ECTS bodova. Koncept trajanja prvog i drugog ciklusa studija može biti: 3+2 ili 4+1.

Studentima prve godine drugog ciklusa studija po konceptu 3+2 dodaje se 8 bodova (što odgovara četvrtoj godini studija).

Studentima druge godine drugog ciklusa studija po konceptu 3+2 dodaje se 10 bodova (što odgovara petoj godini studija).

Studentima drugog ciklusa studija po konceptu 4+1 dodaje se 10 bodova (što odgovara petoj godini studija).

(4) EKONOMSKO-SOCIJALNA SITUACIJA

Bodovanje će se izvršiti na osnovu ukupnih mjesečnih primanja porodice po članu domaćinstva, a prema kućnoj listi i priloženom dokazu o statusu za svakog člana domaćinstva, kako slijedi:

- | | | |
|----|-----------------|-----------|
| a) | do 60 KM | 25 bodova |
| b) | 61 KM - 100 KM | 20 bodova |
| c) | 101 KM - 150 KM | 15 bodova |
| d) | 151 KM - 200 KM | 10 bodova |
| e) | 201 KM - 250 KM | 5 bod |
| f) | 251 KM - 300 KM | 1 bod |
| g) | preko 300 KM | 0 bodova |

(5) INVALIDNOST STUDENTA (po bilo kom osnovu)

- a) do 30% - 2 boda
- b) 30-60% - 4 boda
- c) preko 60% - 6 bodova

(6) STUDENTI BEZ OBA RODITELJA - 10 bodova

Član 5.
(Lista prioriteta)

U slučaju kada se pojavi veći broj kandidata za dodjelu stipendija, Ministarstvo za obrazovanje, nauku, kulturu i sport Zeničko-dobojskog kantona utvrđuje listu prioriteta prema odredbama člana 4. ovih kriterija.

Član 6.
(Konkursna procedura)

- (1) Stipendije se dodjeljuju na osnovu konkursa koji se objavljuje u jednom od dnevnih novina i u listu „Naša riječ“, na općinskim oglasnim pločama i na službenoj web stranici Zeničko-dobojskog kantona.
- (2) Prijave na konkurs sa potrebnom dokumentacijom kandidati dostavljaju resorno zaduženim službama za društvene djelatnosti općine u kojoj imaju prebivalište. Izbor kandidata za dodjelu stipendija vrši komisija nadležne općinske službe.
- (3) Rukovodilac nadležne općinske službe rješenjem formira komisiju koja vrši bodovanje i rangiranje kandidata, te objavljuje **preliminarnu listu** prema broju bodova, ostvarenim na konkursu.
- (4) Sve eventualne **prigovore** (obrazložene i utemeljene na dokazima) na preliminarnu listu, kandidati mogu podnijeti nadležnoj općinskoj službi u roku od 8 dana od objavljivanja na oglasnoj ploči matične općine.
- (5) Nakon razmatranja podnesenih prigovora, komisija sačinjava **konačnu preliminarnu listu** na koju kandidati imaju mogućnost ulaganja **žalbe**. Putem nadležne općinske službe žalba se podnosi Ministarstvu za obrazovanje, nauku, kulturu i sport Zeničko-dobojskog kantona u roku od 8 dana od objavljivanja konačne preliminarne liste na oglasnoj ploči matične općine.
- (6) Ministarstvo obrazovanja, nauke, kulture i sporta zadržava pravo da u toku konkursne procedure, a na osnovu slučajnog uzorka, izvrši uvid u bodovanje koje vrše općinske komisije.

Član 7.
(Način isplate sredstava)

- (1) Isplatu sredstava u dva jednaka bespovratna iznosa vršit će nadležne općinske službe putem tekućeg računa studenta, a prema konačnim listama koje dostavlja Ministarstvo za obrazovanje, nauku, kulturu i sport Zeničko-dobojskog kantona.
- (2) Nadležna općinska služba dužna je dostaviti Ministarstvu izvještaj po isplati doznačenih sredstava.

Član 8.
(Objavljivanje Kriterija)

Kriteriji za dodjelu stipendija redovnim studentima prvog i drugog ciklusa studija sa prebivalištem na području Zeničko-dobojskog kantona u akademskoj 2011/2012. godini objavit će se na općinskim oglasnim pločama i na web stranici Zeničko-dobojskog kantona.

Broj: 02-_____/12.
Datum, 31.05.2012. godine
Zenica

PREMIJER

mr.sci. Fikret Plevljak, dipl.ing.

DOSTAVLJENO:

1x Ministarstvo za obrazovanje, nauku, kulturu i sport,
1x Ministarstvo finansija,
1x a/a.